

Avisinnlegg til Vestnes avis om UNGDOMSTING 2019

Ungdommar vil bli høyrte i kyrkja

– Kyrkja er viktig for ungdommen og det må satsast mykje sterkare på å få ungdom inn i jobbar i kyrkja. Dette var meldinga frå 40 ungdommar frå kyrkjelydane i Møre, samla til ungdomsting på Vestnes. Biskop Ingeborg Midttømme deltok under heile samlinga, m.a med innlegg, samtale, gudsteneste og meir uformelt samver. Samlinga var leia av ungdomsrådet støtta av rådgivar for Ungdom i Møre bispedøme, Inger Marie J.Sylte og rådgivar diakoni, Toril Holm.

Ungdommane var samla for drøfte ungdommen si rolle i kyrkja, inspirere kvarandre til engasjement i kyrkjelyden og sette søkelys på utdanning til kyrkjelege stillingar som kateket, diakon, prest eller kantor.

Frå Vestnes kommune var det fire delegater som var påmeldt til Ungdomstinget. Av dei vart Odin Johan Jakobsen Sylte valgt inn som vara i det nye ungdomsrådet.

– Det var flott å møte alle dei som var med på Ungdomstinget. Alle som deltok var veldig hyggelege og opne. Dei var lette å bli kjent med. Eg vil sitje i ungdomsrådet fordi då kan eg gjere noko som er viktig for meg og trua mi. Det var veldig kjekt at biskopen brukte så god tid til å snakke med oss. Ekstra kjekt var det å møte teologistudentene, oppsummerer Odin Johan J.Sylte.

Kyrkja si framtid

– Ungdommen er kyrkja si framtid, og vår stemme må bli høyrte, understrekar ungdommane.

Under samlinga drøfta dei spørsmål som:

- *Kva skal til for at ungdommar skal velje ei yrkeskarriere i kyrkja?*
- *Kva hindrar ungdom frå å velje eit studium til kyrkjeleg teneste?*
- *Korleis kan ungdomsråd og organisasjonar rekruttere ungdom og unge vaksne til å arbeide i kyrkja?*

Mange ungdommar opplever at det i skuledagen og kvardagen er lite informasjon og kunnskap om kyrkjelege stillingar, og at det også finst ein del fordommar knytt til kyrkja. Kristne ungdommar kan også oppleve stigmatisering.

For å betre på dette kom det fram ei rekkje konkrete forslag, slik som:

- Skape eit sterkare miljø for ungdom i kyrkja
- Meir dialog mellom yrkesgruppene i kyrkja og ungdom
- Promotere kyrkjelege jobbar betre, både i kyrkjerommet, leirar, samlinger osv
- Gi ungdommen meir ansvar og oppgåver i gudstenesta
- At kyrkja er synleg på utdanningsmesser og andre jobb-arenaer
- personlige møte med menneske som har jobb i kyrkja.

Rekruttering

Ungdomstinget i Møre etterlyser sterkare tiltak for å rekruttere ungdom til kyrkjelege utdanning og kyrkjelege stillingar. Gjennom gruppearbeid har dei kome fram til eit felles uttale som dei vil sende vidare til bispedømerådet og Ungdommens kirkemøte som er seinare i år.

Snittalderen mellom tilsette i kyrkja aukar og det er utfordrande å rekruttere. Samtidig viser undersøkingar at ungdom som startar på kyrkjelege utdanning i all hovudsak har bakgrunn frå kristent ungdomsarbeid. Derfor har dei kyrkjelege ungdomsråda ei viktig rolle.

Under ungdomstinget på Vestheim i Vestnes var det ved sidan av sjølve sakskartet også gruppearbeid med case, foredrag om klima, god tid til å bli kjent, sosialt samvær og aktivitetar.

Rådgivande

Ungdomsrådet i Møre bispedøme har ein rådgjevande funksjon overfor biskop og bispedømeråd, kjem med innspel kring ungdomsspørsmål og kan fremme saker overfor desse organa. Rådet skal også vere ein ressurs for ungdomsarbeid og kyrkjelydsliv i Møre og skal vere involvert i fordeling av ressursar til ungdomsarbeid i kyrkjelydane.

Ungdomsrådet består av eit arbeidsutval på 7 ungdommar frå kyrkjelydane i Møre. Desse kjem saman til møte fire gonger i året. I tillegg blir det årlig halde eit ungdomsting, der alle ungdommar i Møre som er medlemmar i kyrkja kan delta. Bispedømerådet møter også ungdomsrådet minst ein gong i året.

For meir informasjon:

Rådgivar ungdom; Inger-Marie Jakobsen Sylte. mobil: 997 17 442

